

Siunnersuut uunga: Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. xx.xx 2016. (Isumaginninnermi malittarisassanik kommunit aqutsinerannik atorunnaarsitsineq)

(Ilaqutariinnermut, Naligiissitaanermut Isumaginninnermullu Naalakkersuisunut ilaasortaq)

Akissuteqaat

(Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisunut ilaasortaq)

Pingajussaannerneqarnera

Isumaginnittoqarfiup aqunneqarnera aaqqissuussaanelu pillugit Inatsisartut peqqussutaannik Inatsisartut inatsisaattut allannguutissatut siunnersuut, 27. maj 2016 aappassaaneerreqareerneratigut ataatsimiititami suliarineqartussatut innersuunneqarpoq. Ilaqutariinnermut Peqqissutsimullu Ataatsimiititaliap ilaatigut isummerfigaa, Kommuneqarfik Sermersuumiit ilassutitut akissuteqaat 26. maj 2016 tiguneqartoq. Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoq peqatigalugu 29. maj 2016 isumasioqatigiittoqarpoq. Tassani isumasioqatigiinnermi Kommuneqarfik Sermersuumiit ilassutitut akissuteqaat eqqartorneqarpoq, ataatsimiititamiillu paaserusutat apeqquteqaateqarfigineqarlutik.

Naalakkersuisut sinnerlugit Ilaqutariinnermut Peqqissutsimullu Ataatsimiititaliaq qutsavigissavara, Isumaginnittoqarfiup aqunneqarnera aaqqissuussaanelu pillugit Inatsisartut peqqussutaannik suliaqarnermi annertuumik tunniussimasimaneranut, taamatullu qujassutissaalluni pissarsiviusumik oqaloqatigiissimaneq. Paaseqatigiinnerunermik suliallu eqqortumik sukumiisumillu ingerlassinnaaneranut tunngaviliisumik.

Naalakkersuisut kommunenik suleqateqarnerup nukittorsarnissaa iliuuseqarfiusumik ujartuiffiusumillu ingerlatissavaa, attavigeqatigeeriaaseq nutaaliaasoq, ammasoq inussiarnersorlu atornerigut Naalakkersuisut naatsersuutigaat, kommunet Naalakkersuisullu akornanni suleqatigiinneq nukittunerusoq pilersinneqassasoq.

Siunnersuutikkut nukittorsaavigineqarput isumaginninnermik sumiiffimmi qitiusumillu aqutsineq nukittorsaavigineqassaaq, isumaginnittoqarfiup nammaqatigiittumik ataatsimuulersinneragut. Tassuunalu qulakkeerlugu isumaginnittoqarfiup aqunneqarnera kommunenut, innuttaasunut Naalakkersuisunullu sunniutilimmik pitsaanerpaamillu pissasoq. Ullut ilaanni pisariaqalissappat piffissakkut killilikkamik kommunep isumaginninnermi maleruaqqusanik ingerlatsinera atorunnaarsikkallassallugu, pissutsit ima ilungersunartigilersimassapput allaat allatut qanoq iliuuseqarsinnaaneq eqqarsaatissaajunnaarsimassalluni. Naalakkersuisut akulerutinngippata, aarlerinartoqarpoq marloriaammik sumiginnaasoqarsinnaanera. Naalakkersuisut uunga

inissinnaveersaartariaqarput, naak allaffissornikkut ingerlatsinermi annertuumik sumiginnaasoqartoq ilisimagaluarlugu iluuseqarnissamut inatsisitugut sakkussaqaqatik.

Naalakkersuisulli ajuusaarutigaat, siunnersuutip akuerineqarnissaanik innersuussuteqarneq eqqarsaatigalugu Ilaqutariinnermut Peqqissutsimullu Ataatsimiititaliaq tamakkiisumik isumaqatigiissinnaangimmat, taamalu suli ikinnerussuteqartut innersuussutigimmassuk, siunnersuutip itigartitsissutigineqarnissaa.

Oqaatsit annissakka atorlugit, inatsisissatut siunnersuut Inatsisartuni suliarineqaqqittussanngortinneqarpoq.